



Komunikadu Imprensa

16 Feveiru 2023

Parlamentu Nasionál

JSMP Konsidera deputadu sira la konsistente no sériu hodi fó prioridade ba Eleisaun Komisáriu KAK foun

Parlamentu Nasionál (PN) iha loron 13-14 Feveiru 2023, liuhusi plenária halo mós ajendamentu ba Eleisaun kandidatura uníku ba Komisáriu Komisaun Anti Korrupsaun (KAK) foun ne'ebé Governu propoin ba mandatu tinan 2023-2026, maibé la bele realiza tanba aktu *walk out* husi deputadu sira nune'e la prenxe rekezitu ne'ebé lei prevee hodi halo votasaun.

Proposta naran ne'ebé VIII Governu Konstitusionál propoin hodi apresenta ba PN, iha loron 06 Feveiru 2023, bazeia ba provizaun Artigu 7 pontu 1 hosi Lei Nú. 8/2009 kona-ba Lei Komisaun Anti Korrupsaun, mak Dr. José da Costa Ximenes nu'udar kandidatura ba komisáriu foun.

“JSMP konsidera deputadu sira la konsistente ho agenda ne'ebé sira aprova ona iha reuniaun lider bankada sira hodi submete mai iha plenária atu diskute no vota ba komisáriu foun no aktu *walk out* husi deputadu CNRT ho PD hodi lakohi partisipa iha eleisaun komisáriu ne'e, nu'udar direitu ida, maibé aktu ne'e mós sei prejudika tebes funsionamentu instituisaun KAK nia serbisu lor-loron hodi bele ezerse nia pápel ho di'ak atu Kombate korrupsaun iha Timor-Leste,” dehan Diretora JSMP, Ana Paula Marçal.

Nu'udar órgaun ne'ebé representa interese povu, JSMP husu ba deputadu sira atu ezerse kna'ar ho responsabilidade no tenke tau prioridade ba interese estadu nian ás liu interese sira hotu ho ida ne'e mak bele evita intervensaun direta Parlamentu nian ba funsionamentu normal instituisaun estadu sira nian hanesan KAK no la bele kahur interese partidarismu ka grupuismu hodi sakrifika tiha interese nasional nasaun no povu nian.

Atu solusiona prolema kona-ba kandidatura ne'e, JSMP rekomenda ba PN atu fó filáfali lista kandidatura atuál hodi husu Governu hahú prosesu selesaun foun ne'ebé transparente no laiha imprensaun favoritismu ba públiku, liuhusi mekanizmu selesaun ne'ebé rigór. Nu'une atu hatan ba kestaun ne'e, JSMP rekomenda ba Governu atu kria regulamentu ida hodi sai matadalan atu regula kona-ba mekanizmu ba prosesu rekutamentu komisáriu KAK ho transparente no kompetitivu liuhusi komisaun eventual ne'ebé bele mai husi ema perítu sira iha setór judisiáriu nian no mós akademista.

Entretantu kona-ba polémika provizaun Artigu 7 pontu 1 kona-ba designasaun komisáriu mai husi PN sob-proposta mai husi Governu no ho maioria absoluta husi prezensa deputadu efetiva iha plenária hamutuk $\frac{3}{4}$ (deputadu hamutuk 49).

JSMP rekomenda atu iha futuru deputadu sira bele halo alterasaun ba provizaun Artigu 7 pontu 1 ne'e hodi bele loke dalan atu Governu bele propoin kandidatura liuhusi ida hodi nune'e bele akomoda mós kandidatu husi parte opozisaun hodi bele evita problema hanesan akontese iha futuru.

Deputadu ne'ebé hola pozisaun *walk out* mai husi bankada CNRT ho bankada PD hodi la marka prezensa iha plenária ba agenda eleisaun Komisáriu KAK foun ho razaun tanba laiha komunikasaun polítika entre bankada sira kona-ba kandidatura ne'ebé Governu propoin ba komisáriu KAK foun.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Website: <http://jsmp.tl>